

11/08/1999

Rakyat hanya pandai cari `kambing hitam'

Azran Abdul Rahman

BERADA di puncak kuasa sebuah negara bagi seorang pemimpin yang selalu serius, yang hanya seolah tahu berfikir dan bekerja, memanglah akan selalu berada dalam persekitaran yang sunyi, sepi dan terasing. Dan dengan karisme yang erat melekat pada diri pemimpin itu, lengkaplah kesunyian, kesepian dan keterasingannya.

Kesunyian, kesepian dan keterasingan yang sukar dibayangkan! Dan apabila tiba-tiba kemakmuran hidup rakyat yang sekian lama dinikmati dirasakan mulai tergugat dan semakin gawat, apa sekalipun puncanya, amat sukar untuk diterima oleh masyarakat.

Lebih-lebih lagi pada masa yang sama, ketika gawat yang genting dan hampir melumpuhkan ekonomi negara, satu keputusan lain yang tidak popular mesti pula dibuat oleh pucuk pemimpin tanpa merasa perlu untuk menangguhkannya.

Dalam hal ini tentulah penguasa iaitu pemimpin berkenaan dikecam dan dipersalahkan. Buah fikiran pemimpin itu yang walaupun sekian lama membawa kemakmuran hidup rakyat, seperti terlupus. Kerja kerasnya membawa kemajuan negarapun seolah-olah terhapus.

Masyarakat amat sukar untuk menerimanya. Alasan apa sekalipun diberikan, masyarakat lebih gemar menolaknya. Masyarakat lebih gemar mencari `kambing hitam' (scapegoat) untuk dikecam dan dipersalahkan.

Satu ketika dahulu, pada zaman yang kita kurang pasti, seorang pujangga Jawa bernama Ronggorwarsito, melalui syairnya seolah mengecam pihak berkuasa. Mungkin waktu itu keadaan dalam negara di sana tidak menentu. Kehidupan rakyat semakin susah, undang-undang tidak dipatuhi dan terjadi kacau-bilau sehingga wibawa kerajaan terjejas.

Keadaan negara yang huru-hara ketika itu yang menuju anarki digambarkannya melalui bait-bait puisinya dalam Kalatida dengan kata-kata:

Darjat kerajaan telah luntur; peraturan jadi kacau; zaman seakan gila;

Tetapi pujangga Jawa ini nampaknya amat bijaksana. Dia mengecam tetapi tidak secara melulu. Dia mengkritik tetapi dia tidak mengkritik semata-mata. Dia juga sedar akan putaran alam dan kudrat sebuah kerajaan atau penguasa. Dalam bait seterusnya dia menulis:

Ratune ratu utama; patihe patih linuweh; pra nayaka tias raharja; panakare becik-becik ...

(Rajanya raja yang mulia; perdana menteri orang terbilang...)

Melalui baris di atas itu, Ronggorwarsito memuji pula pihak penguasa dengan mengatakan bagaimana tingginya mutu sang penguasa, termasuk pembantunya terutama perdana menteri yang terbilang - cekap menjalankan urusan negara sehingga pegawai berada dalam suasana kesejahteraan dan rakyat hidup aman dan makmur (pra nayaka tias rakarja panakase becik-becik)

Betapa bijaksananya pujangga Ronggowarsito. Masa gawat tidak dianggap sepenuhnya sebagai kesalahan kerajaan atau pemimpin. Apa yang terjadi adalah semacam takdir, iaitu datangnya masa yang suram. Takdir atau hukum alam memang seperti roda kereta.

Roda kereta akan berputar. Masa makmur dan masa gawat akan silih berganti. Zaman baik datang, tetapi kelak zaman buruk menggantikannya. Apabila terjadi, menurut pujangga Jawa ini, betapapun cekap atau bermutunya seseorang pemimpin, itu, kemelesetan atau kegawatan pasti tidak akan dielakkan.

Tetapi pemimpin yang baik tidak akan duduk diam dan menyerah atau

memilih jalan mudah. Memilih jalan mudah memang tidak susah; serahkan saja segala urusan pemulihan kepada pihak asing seperti yang dilakukan oleh semua negara malang yang lain di dunia ini.

Tetapi ini pun ternyata telah tidak menjamin pemulihan ekonomi negara terbabit. Sebaliknya negara terbabit seperti dijajah semula oleh kuasa asing, seperti yang sering kali disuara dan dibimbangkan oleh Datuk Seri Dr Mahathir Mohamad akan terjadi kepada negara kita.

Menyerahkan kepada pihak asing semua urusan pemulihan ekonomi negara dengan syarat yang mereka tetapkan, persis bererti menyerahkan nadi kehidupan kita kepada mereka. Jadi, apakah kita rela? Apakah kita tega?

Pemimpin yang baik sebaliknya akan terus berusaha melawan untuk cuba membaiki takdir. Dan inilah yang dilakukan oleh Dr Mahathir apabila kemelesetan dan kegawatan yang tidak terelakkan itu melanda negara.

Apa boleh buat, sebahagian rakyat hanya pandai mengecam dan mencari 'kambing hitam'. Dan walaupun dalam keadaan yang genting itu, beliau terpaksa pula membuat keputusan politik yang tidak popular. Sedang Barat terutama media massanya merasa mendapat kesempatan semula untuk mengecamnya. Kali ini, kesempatan dalam keadaan yang paling baik.

Entah kenapa Perdana Menteri Malaysia yang satu ini tidak disenangi Barat. Apakah kerana sikapnya yang tidak menampakkan pro Barat apabila beliau melancarkan dasar 'Memandang ke Timur' selepas menduduki kerusi Perdana Menteri pada 1981 dan kemudian 'Buy British last'?

'Memandang ke Timur' tidak bererti hanya memandang ke Jepun, meski pun secara harfiah ia membawa pengertian demikian. Ia juga membawa erti memandang diri kita sendiri, pada nilai murni dan kekuatan budi daya kita sendiri.

Ibarat sekeping kertas yang sekian lama digulung. Ia pasti akan tergulung juga walaupun kita sudah membuka alat yang menggulungnya. Untuk itu, pertama sekali kita mesti membuang alat yang menggulungnya, kemudian menggulung kebalikannya (secara terbalik), barulah kertas itu akan terhampar dalam kewujudannya yang asal. Dr Mahathir sudah melakukannya dengan cara ini.